

Siðanefnd Blaðamannafélags Íslands.

Mál nr. 3/2012-2013

Kærandi: A

Kærðu: Björn Þorláksson, ritstjóri akureyrivikublað.is og vikublaðsins Akureyri.

Kæruefni: Frétt undir yfirskriftinni „Sýknaður af niði passar börn“.

Málsmeðferð:

Kæra barst siðanefnd 22. janúar 2013 með bréfi, dags. 21. janúar 2013. Kærandi hefur lagt fram ljósrit af forsíðu vikublaðsins Akureyri frá 18. janúar 2013 og útskrift af vefnum akureyrivikublað.is. en á báðum stöðum er hina kærðu umfjöllun að finna. Málið var tekið fyrir á fundi nefndarinnar 29. janúar 2013. Siðanefnd óskaði eftir greinargerð kærða, sem barst nefndinni 6. febrúar 2013. Málið var aftur tekið fyrir á fundi siðanefndar 7. febrúar 2013.

Málavextir:

Í hinni kærðu umfjöllun er því lýst að karlmaður sé að störfum á Akureyri sem dagforeldri og passi þar 4-6 börn þrátt fyrir að hafa verið sýknaður í héraðsdómi og Hæstarétti af ákæru vegna meints kynferðisbrots gegn syni. Í umfjölluninni er sérstaklega tekið fram að dómstólarnir hafi talið töluverðar líkur á sekt. Í fréttinni er tekið fram að dómur Hæstaréttar í málinu hafi gengið á árinu 2011.

Kærandi telur að birting fréttarinnar, sem unnin sé eftir nafnlausri ábendingu, hafi ekki þjónað almannahagsmunum og framsetninguna megi jafna við nafnbirtingu hans vegna þess að fáir karlmenn starfi sem dagforeldrar og auðveldlega megi nálgast lista með yfirliti yfir þá sem starfa í dag. Við vinnslu fréttarinnar hafi blaðamaður ekki reynt að hafa samband við kæranda til þess að gefa honum kost á að koma á framfæri sjónarmiðum sínum. Þá sé skaðinn ekki einungis kæranda heldur einnig meints fórnarlamb og allra þeirra sem standa kæranda næst. Kærandi lýsir því að rangt sé að hann hafi passað 4-6 börn þar sem þau hafi í raun verið þrjú, þar af tvö þeirra hans eigin. Þá hafi hann í kjölfar fréttarinnar misst frá sér það barn sem dvalið hafi hjá honum og að hann telji litlar líkur til þess að foreldrar leiti til hans og hann sé því í raun atvinnulaus vegna umfjöllunarinnar. Kærandi telur að ofangreind frétt brjóti í bága við 3. og 4. grein siðareglna B.Í.

Hinn kærði blaðamaður krefst þess að kröfum kæranda verði hafnað.

Umfjöllun:

Siðanefnd telur að ekki séu efni til að líta svo á að blaðamaður hafi brotið gegn 3. gr. siðareglna með því að flytja frétt af því að starfandi sé dagforeldri sem sýknaður hefur verið í refsímáli af ákæru um kynferðislega meingerð. Blaðamaður mátti líta svo á að umfjöllunin hefði haft erindi til almennings og að hún þjónaði almannahagsmunum. Þá er blaðamanni ekki skylt að geta heimildarmanna sinna og því er ekki fallist á þá málsástæðu kæranda að máli geti skipt þótt fréttin hafi verið unnin eftir „nafnlausri ábendingu“. Kærandi er ekki nafngreindur í fréttinni og siðanefnd fellst ekki á að birting fréttarinnar megi jafna við nafnbirtingu. Tilvitnun blaðamanns til þess að dómstólar hafi talið töluverðar líkur á sekt kæranda er rétt og fær stoð í forsendum héraðsdóms sem vísað var til í niðurstöðu

4705


Hæstaréttar. Sú tilvísun getur ekki talist brot gegn 3. gr. eða 4. gr. siðareglna enda verður að líta á hana sem eitt megininntak fréttarinnar og siðanefnd tekur ekki afstöðu til hvort slík fullyrðing í forsendum sýknudóms í sakamáli sé við hæfi.


Við vinnslu fréttarinnar leitaði blaðamaður staðfestingar hjá Akureyrarbæ á því að fréttin væri efnislega rétt, að einstaklingur, sem sýknaður hefði verið af ákæru um kynferðisbrot gegn barni, starfaði við daggæslu þar í bæ. Kærandi er ekki nafngreindur og ekki verður annað séð en að fréttin sé að öðru leyti byggð á traustum heimildum enda liggur ekki annað fyrir en að hún sé efnislega rétt, utan þeirrar ónákvæmni að kærandi hafi haft umsjón með þremur börnum en ekki 4 til 6 eins og segir í fréttinni. Sú ónákvæmni breytir engu um megininntak fréttarinnar. Loks telur siðanefnd að kærandi hafi ekki hagsmuni af því að fjallað verði um það hvort birting fréttarinnar hafi haft í för með sér skaða fyrir aðra en hann sjálfan og siðanefnd telur að sú aðstaða, sem kærandi lýsir að leitt hafi af fréttinni fyrir hann, þ.e. að hann sé því í raun atvinnulaus vegna hennar, geti ekki haft áhrif á niðurstöðu í málinu.


Úrskurður:


Kærði, Björn Þorláksson, telst ekki hafa brotið gegn siðareglum við umfjöllun sína undir fyrirsögninni „Sýknaður af níði passar börn“, sem birtist á vefnum akureyrivikublað.is 17. janúar 2013 og í vikublaðinu Akureyri 18. janúar 2013.


Reykjavík, 7. febrúar 2013.


Björn Vignir Sigurpálsson


Hjörtur Gíslason


Asgeir Þór Arnason


Friðrik Þór Guðmundsson


Róbert Haraldsson